

Cumbatter la violenza

Julia Müller vul savair co il chantun vul impedir violenza cunter dunnas

■ **(anr/ac) Violenza cunter dunnas è chastiabel, discriminant è violescha ils dretgs umans. Quai scriva la deputada Julia Müller (ps, Trin) en sia dumonda inoltrada a chaschun da la sessiun d'avust. La deputada vul savair da la regenza co ella prevedia dad infurmar e sensibilisar la populaziun en connex cun violenza cunter dunnas.**

La deputada *Julia Müller* (ps, Trin) sa referescha en sia dumonda inoltrada a chaschun da la sessiun d'avust dal cussegl grond a las attatgas massivas cunter dunnas succedidas dacurt en Svizra. Ed ella fa attent a l'aut dumber d'unfrendas nudà en il rapport da l'agid per unfrendas dal chantun Grischun ed a las discussiuns en diversas plattafurmas da la rait. Tut quai haja regurdà che la violenza cunter dunnas saja pli dera-sada che supponì, scriva Müller. La deputada e divers cunsegnaders e cunsegnadras vulan savair da la regenza grischuna co ella prevedia da sensibilisar ed infurmar la populaziun en connex cun violenza cunter dunnas e violenza da chasa. Vinavant vul la deputada savair da la regenza sch'ella prevedia dad implementar la convenziun dad Istanbul a moda activa e procurar per ils meds finansials necessaris. L'uschenumnada convenziun dad Istanbul è ina cunvegna iniziada dal Cussegl d'Europa per prevegnir a la violenza cunter las dunnas. Ina cunvegna approvada da la confede-

raziun entrada en vigur l'entschatta avrigl 2018.

Equalitad impedescha violenza

La preambula da quella cunvegna circumscriba tranter auter il fatg che realisar l'equalitad giuridica e reala tranter um e dunna saja in element essenzial per impedir violenza cunter dunnas. La responsabladad da realisar las finamiras da la convenziun dad Istanbul en Svizra giascha era tar chantuns e vischnancas da cuminanza cun organisaziuns nunstatalas. A quella responsabladad regorda la deputada Müller ed ha menziunà en sia dumonda l'interess da l'entira societad e dal stadi dad impedir violenza cunter dunnas. La deputada ha menziunà la risposta da la regenza da l'avust 2017 sin ina intervenziun da la deputada *Sandra Locher Benguerel* (ps, Cuira) nua che la regenza haja scrit dad esser da l'avis che la confederaziun ed il chantun adempleschian per gronda part las pretensiuns da la convenziun dal Cussegl d'Europa. Ed il chantun veglia spetgar ed examinar schebain ulteriuras mesiras sajan inditgadas. Müller fa attent che la regenza haja duvrà tshintg onns per realisar ina pretensiun da l'onn 2009 ed installar in post da coordinaziun en l'uffizi social. Ed usa vul la deputada savair sche la regenza saja pronta da betg sulet procurar per coordinaziun, mabain era da metter a dis-

posiziun meds finansials per lavur concepziunala e projects interdisciplinars. Vinavant vul la deputada savair da la regenza grischuna sch'ella haja l'intent da

scolar ils servetschs chantunals involvids en cas da violenza cunter dunnas cun la realisaziun da las finamiras da la convenziun dad Istanbul.



La deputada Julia Müller (ps, Trin) giavischa infurmaziun da la regenza en connex cun violenza cunter dunnas.

FOTO Y. BÜRKL